

Headlines

1. प्रधानमंत्री नरेंद्र मोदी होर मुख सचिवें दे त्रै दिन दे राश्ट्रीय सम्मेलन दे समापन समारोह गी संबोधित करंगन।
2. “इक राश्ट्र इक चुनांस” सरबन्धी 2 विधेयक कल लोकसभा च पेश कीते जाने दा कार्यक्रम ऐ।
3. गृह मंत्री अमित शाह होरें माओवादिगं गी अपील कीती ऐ जे ओह हथियारें गी छोड़ी देन।
4. उपराज्यपाल मनोज सिन्हा होरें अमरनाथ यात्रा 2024 च शामिल लंगर संगठनं ते गैर सरकारी संगठनं दे मित्रें गी सम्मानित कीता।
- 5 गृह मंत्रालय नै जम्मू-पुच्छ-मेंढर बश्कार रियायती दरें पर इक नमीं हैलीकाप्टर सेवा गी मंजूरी दिती ऐ।

<><><><><><>

PM-SC-Conference

प्रधानमंत्री नरेंद्र मोदी होर नमीं दिल्ली च मुख सचिवें दे चौथे राश्ट्रीय सम्मेलन दी अज्ज दुए रोज अध्यक्षता करा रदे न। त्रै दिन दा एहू सम्मेलन शुक्रवार गी शुरू होआ हा। प्रधानमंत्री होर सम्मेलन दे समापन समारोह गी संबोधित करडन। इस राश्ट्रीय सम्मेलन च इक सांझा विकास एजेंडा तयार करने ते उसदी अमलावरी करने दे अलावा राज्यें कन्नै हिस्सेदारी दी यप-रेखा तय करने पर ध्यान केंद्रित कीता जा रदा ऐ। सारें राज्यें ते केंद्र शासित प्रदेशें दे मुख सचिव, वरिष्ठ अधिकारी ते होरनं बक्ख-बक्ख खेत्तरें दे माहिर इस सम्मेलन च हिस्सा लै रदे'न।

<><><><><><>

One Nation One Election

इक्क राश्ट्र इक्क चुनां कन्नै सरबन्धत दऊं विधेयकें गी कल संगारै 16 दिसंबर गी लोकसभा च पेश कीते जाने दा कार्यक्रम ऐ। केंद्री विधि मंत्री अर्जुन राम मेघवाल होर 129मां संविधान संशोधन विधेयक ते केंद्र शासित प्रदेश संशोधन विधेयक लोकसभा च पेश करडन। प्रधानमंत्री नरेंद्र मोदी हुंदी प्रधानता च केंद्री मंत्रीमंडलै नै वीरवारै लोकसभा ते राज्य विधानसभा चुनाएं गी कन्नो-

कन्नौ करोआए जाने सरबन्धी संवैधानिक संशोधन विधेयक गी मंजूरी दिती ही। प्रस्तावित संविधान संशोधन विधेयक लोकसभा ते राज्य विधानसभा चुनाएं गी इक्के बारी च कन्नै-कन्नै करोआने दे प्रावधान सरबन्धी होग।

<><><><><><>

Amit-Shah C.P

केंद्री गृह मंत्री अमित शाह होरें माओवादियें गी हथियार सुट्टने ते समाज दी मुखधारा च शामिल होने दी अपील कीती। रायपुर च छत्तीसगढ़ पुलिस गी मन्ने-परमन्ने दे राष्ट्रपति मिशन प्रेजिडेंट्स कलर सम्मान दित्ते जाने आहले समारोह च अपने संबोधन दौरान श्री शाह होरें आखेआ जे मार्च 2026 शा पैहले छत्तीसगढ़ गी नक्सल मुक्त बनाने दे केंद्र सरकार दे धेइयै गी पूरा करने च छत्तीसगढ़ पुलिस पूरी दिलेरी ते समर्पण भाव कन्नै नक्सल रोधी अभियान चला'रदी ऐ। केंद्री मंत्री होरें आखेआ जे छत्तीसगढ़ पुलिस गी प्रदान कीते गेदा राष्ट्रपति निशान राज्य पुलिस दी सेवा, त्याग ते बलिदान दा प्रतीक ऐ।

<><><><><><>

Tribute-Sardar Patel

प्रधानमंत्री नरेंद्र मोदी होरें लोह पुरुष सरदार वल्लभभाई पटेल हुंदी अज्ज पुण्यतीथि पर उनेंगी श्रद्धांजलि भेंट कीती। इक्क सोशल मीडिया पोस्ट च प्रधानमंत्री होरें आखेआ जे सरदार पटेल हुंदी शख्यिसत ते उंदे आसेआ कीते गेदे कम्म देसै दी एकता अखंडता ते विकसित भारत दे संकल्प गी हासल करने च देशवासियें लेई प्रेरणा दे स्रोत बने दे रौहडन। गृह मंत्री अमित शाह होरें बी सरदार पटेल होरें गी चेत्ता करदे होई भावें भरोची श्रद्धांजलि भेंट कीती। सोशल मीडिया पोस्ट च श्री शाह होरें 550 शा बह रियासतें गी मलाइये आधुनिक भारत दे निर्माण दा नीह पत्थर रक्खने दा श्रेय पटेल होरें गी दित्ता। तोआई जम्मू कश्मीर दे उपराज्यपाल मनोज सिन्हा होरें बी भारत दे लोह पुरुष सरदार वल्लभभाई पटेल गी श्रद्धांजलि दित्ती। सोशल मीडिया पोस्ट च श्री सिन्हा होरें आखेआ जे सरदार पटेल हुंदे आदर्श ते दूर तगर दिक्खने आहला नजरिया असेंगी इक निगगर ते शानदार भारत दे निर्माण बक्खी प्रेरित मार्गदर्शन करदा रौहग।

<><><><><><>

Ramban-Women Empower

प्रधान सचिव संस्कृति ते स्कूली शिक्षा सुरेश कुमार गुप्ता ते ग्रामीण विकास मैहकमे दे सचिव मोहम्मद एजाज होरें कला केंद्र जम्मू दी जी.आर संतोष गैलरी च जनजातीय कला कार्यशाला दा सांझे तौरा पर उद्घाटन कीता। एहू कार्यशाला कला केंद्र सोसायटी जम्मू ते जम्मू यूनिवर्सिटी दे पेंटिंग डिपार्टमेंट ते म्यूजिक ते फाइन आर्ट्स संस्थान .. दियें सांझे कोश्टें कन्नै लोआई गेई ही। इस मौके पर बोलदे होई सुरेश कुमार गुप्ता होरें ग्रामीण विकास मैहकमे दे अधिकारियें पर जोर पांदे होई आखेआ जे ओहू मकामी कलाकारें गी ग्रामीण आजीविका मिशन च शामिल करने ते ग्राएं-मोह्डें दियें महिलाएं गी उंदियें रिवायती कलाएं च रचनात्मक पहलू जोड़ने च उंदी रहनुमाई करन। एहू कार्यक्रम स्वयं सहायता समूहें दियें महिलां कारीगरें गी उंदे रिवायती कौशल गी दस्सने लेई मंच उपलब्ध करोआंदा ऐ।

<><><><><><>

PM-MKB

प्रधानमंत्री नरेंद्र मोदी होर इस महीने दी 29 तरीक गी बडुलै 11 बजे आकाशवाणी थमां मन की बात कार्यक्रम च श्रोताएं कन्नै अपने विचार सांझे करंगन। श्रोता स्टाडे टोल फ्री नंबर 180011-7800 पर फोन करियै अपने सुझा भेजी सकदे न। तुस अपने सुझा नरेंद्र मोदी ऐप या माई गोव ओपन फोरम राएं बी सांझे करी सकदे ओ। इस कड़ी लेई सुझा 27 दिसंबर तगर भेजी जाई सकदे न।

<><><><><><>

LG-Felicitaiton

उपराज्यपाल मनोज सिन्हा होरें इस बरे दी श्री अमरनाथ जी दी जात्तरा दौरान तीर्थ यात्रियें लेई लंगर ते होर दुइयें सेवां दी बवस्था करने आहले लंगर संगठनें ते गैर सरकारी संगठनें दे मिम्बरें गी अज्ज सम्मानित कीता। सोशल मीडिया एक्स पर अपने इक्क सनेअ च श्री सिन्हा होरें आखेआ जे इस बरे दी जात्तरा दौरान श्रद्धालुएं दी सेवा ताई उंदी बिजन स्वार्थ दी सेवा ते अनमुल्ले जोगदान लेई ओहू आभारी न।

<><><><><><>

Helicopter Service Poonch

गृह मंत्रालय नै जम्मू ते मेंढर बश्कार रियायती दरें पर इक्क नमीं हेलीकाप्टर सेवा गी मंजूरी दित्ती ऐ। दूर-दरेडे मेंढर सेक्टर लेई किफायती हवाई सेवा ते बेहतर राबतें लेई पुट्टी गेदी एह इक्क ऐतिहासिक गैहू ऐ। एहदे कन्नै स्यालै दरान मेडिकल एमरजेंसी दी सूरतै च बी बड़ी मदाद हासल होग। मेद ऐ जे भविक्ख च इस गैहू कननै सरहदी सैलसफे गी बी बढावा थ्होग। जम्मू-कश्मीर दे शहरी हवाबाजी सरबन्धी मैहकमं दे सचिव मोहम्मद एजाज असद हारें दूर-दरेडे इलाके मेंढर गी स्याले दी राजधानी जम्मू कन्नै सिद्दे सेवा दा प्रस्ताव केंद्र च भेजेआ हा जेदे पर सरकारै एह फैसला लैता ऐ।

<><><><><><>

Rana-JPDCL

जल शक्ति मंत्री जावेद अहमद राणा होरें बिजली दी बंड सरबन्धी जम्मू पावर डिस्ट्रिब्यूशन कापोरेशन लिमिटेड दी स्यालै आहली रूते लेई तयारिएं दा जायजा लैता। उनें जम्मू खित्ते दी चिनाब घाटी दे पीर पंचाल आहले इलाके च खासतौर पर बिजली दी दस्तेयाबी दा जायजा लैता। बैठक दी अध्यक्षता करदे होई जावेद राणा होरें पूरा पराता सरिस्ता रक्खने लेई गलाया तां जे इलाके च बर्फबारी होने करी कुसै गी परेशानी पेश नेई आवै। राणा होरें बैठक च मुतल्लका अधिकारिएं गी आखेआ जे ओहू बिजली दी कटौती बारै पैहले सोयां लोकें गी दस्सी देन तां जे उनेंगी कोई परेशानी पेश नेई आवै।

<><><><><><>

National-Integration Day

राजौरी जिले च भाटा दूरिया दी संगियोट थाहर राश्ट्री एकता दिवस जोश जज्बे कन्नै मनाया गेआ। एहू कार्यक्रम भारती सेना ते मकामी लोकें बश्कार आपसी सहयोग ते इकजुटता दी भावना दा प्रतीक हा। एहदे च नौजोआनें, छात्रें आसेआ सांस्कृतिक ते सामाजिक जागरूकता आहले कार्यक्रमें दे कन्नो-कन्नी विजन आदमी आहले परोआरें गी सिलाई मशीनां, कंबल, गद्दे ते दोआइयां तकसीम कीतियां गेइयां। कार्यक्रम च हिस्सा लैने आहले विद्यार्थियें गी पढाई-लिखाई सरबन्धी समेआन ते वालीबॉल दित्ते गे। मकामी लोकें भारतीय सेना दियें कोश्टें दी सराहना कीती।

<><><><><><>

SVEEP-Samba

साम्बा दे ब्लॉक विकास अफसर साकिब शरीफ खान होरें स्वीप कार्यक्रम तैहत छजवाल पंचैत घर च मतदाताएं दे नां दर्ज करने लेई इक विशेष कैंप लोआया। कैंप दा मकसद मते शा मते मतदाताएं दे नां दर्ज करना ते वोटर लिस्टें च जेड़ी कोई बी गलती जां कमी पेश होऐ, उसी सधेरना हा। कार्यक्रम दौरान अधिकारियें लोकें गी नां दर्ज कराने, गलतियां सधेरने, लोड़चदे बदलाव करने, नमें नांऽ जोड़ने जां नांऽ कटाने दे कम्मै च पूरी मदद कीती। इस मौके लोकें गी आखेआ गेआ ऐ जे ओहू जारी इस विशेष अभियान तैहत जरूर जाइयै अपने ब्यौरे दी जांच तसदीक करी लैन।

<><><><><><>

Nasha Mukht Abhiyan Rajouri

राजौरी दे मुख शिक्षा अधिकारी बिशम्बर दास होरें जिले दे 8 शैक्षणिक जोनें हेठ औने आहले हायर सेकेंडरी स्कूलें दे विद्यार्थिंएं लेई नशामुक्त अभियान दे तैहत आनलाइन पैनल परिचर्चा दा आयोजन कीता। जिले दे 30 हायर सेकेंडरी स्कूलें थमां तकरीबन 1500 विद्यार्थिंएं अपने नोडल अधिकारिंएं कन्नै इस कार्यक्रमै च हिस्सा लैता। इस दौरान नशे करी दिल दिमाग ते समाज पर पौने आहले माड़े असर पर लोऽ पाई गई ते नशे दी लत शा बाहर निकलने दे हल बी उपलब्ध करोआए गो। इस आयोजन नै इक सुरक्षित ते साफ-सुथरा माहौल बनाइयै विद्यार्थिंयें दे औने आहले कल गी बेहतर बनाने ताई जिला प्रशसन ते शिक्षा विभाग दे धेइयै गी होर बी पक्का कीता।

<><><><><><>

Weather

हर एक लंग्घदे दिन दे कन्नै सीत लहर दा प्रकोप उप्परोतली बददा जा करदा ऐ, टकोहदा करियै रातीं आहले तापमान च गिरावट दर्ज कीती जा'रदी ऐ। मौसम विभाग ने 21 दिसंबर तगर आमतौर पर मौसम दे खुशक रौहने दी पेशगोई कीती ऐ। उप्परलियें धारें पर होई दी ताजा बर्फबारी, सिफर थमां हेठ आई चुके दे तापमान ते उप्पर इलाके दियें सड़कें पर बर्फीले हालात गी दिखदे होई सैलानियें, यात्रुएं ते ट्रांसपोर्टिं गी यातायात सरबन्धी जारी कीतेगेदे निर्देशें दी पालमा करने दी सलाह दिती गई ऐ। पुंछ ते राजौरी जिलें गी शोपियां कन्नै जोड़ने आहली ऐतिहासिक मुगल रोड थमां बर्फ हटाने दे अभियान परैंत उसी हल्की ते लोहिकयें मोटर गड्डियें लेई परतिये खोली दित्ता गेआ ऐ। एहू रोड पीर गी गली दे आले-दोआले होई दी ताजा बर्फबारी मगरा पिछले त्रौं दिनें थमां बंद ही।